

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 427712 22 St
Tuzla, 05.12.2023. godine

OPĆINSKI SUD U TUZLI, stečajni sudija Vedran Milašinović, u stečajnom postupku nad imovinom društva „COBRA-SECURITY“ d.o.o. Tuzla, za poslove fizičke i tehničke zaštite, transport i usluge, ul. Prve Tuzlanske brigade 3, u stečaju, koje zastupa stečajni upravnik Almir Bajrić iz Tuzle, nakon provedenog stečajnog postupka, donio je dana 05.12.2023. godine slijedeće

RJEŠENJE

ZAKLJUČUJE SE stečajni postupak nad imovinom dužnika „COBRA-SECURITY“ d.o.o. Tuzla, za poslove fizičke i tehničke zaštite, transport i usluge, ul. Prve Tuzlanske brigade 3, u stečaju, matični broj subjekta 1-6317, JIB: 4209389190005.

Rješenje će se objaviti na Oglasnoj tabli suda, WEB stranici suda, Službenim novinama FBiH, te dostaviti FIA.

Pravne posljedice zaključenja stečajnog postupka nastupiće po proteku osam dana od objavljivanja rješenja u „Službenim novinama FBiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

Obrazloženje

Rješenjem broj: 32 0 St 427712 22 St od dana 05.12.2022. godine otvoren je stečajni postupak nad imovinom dužnika „COBRA-SECURITY“ d.o.o. Tuzla, za poslove fizičke i tehničke zaštite, transport i usluge, ul. Prve Tuzlanske brigade 3.

Tokom postupka su ispitane sve prijave potraživanja, te su povjeriocima priznata potraživanja u ukupnom iznosu od 448.555,68 KM. U viši isplatni red su svrstana potraživanja u ukupnom iznosu od 159.588,59 KM, u opšti isplatni red u iznosu od 271.914,37 KM, a u niži isplatni red u iznosu od 17.052,72 KM.

Unovčenjem stečajne mase u ovom postupku je ostvaren iznos od 39.547,00 KM, od čega je prodajom pokretne imovine ostvaren iznos od 11.955,00 KM, naplatom potraživanja 6.425,00 KM, povrat sredstava od motornih vozila prodatih prije otvaranja stečaja 8.200,00 KM, te povratom sredstava od lizinga 12.927,00 KM.

Stečajni upravnik je dostavio prijedlog završne diobe dana 06.07.2023. godine, u kojem se navodi da unovčena stečajna masa iznosi 39.547,00 KM i to prodajom pokretne imovine je ostvaren iznos od 11.955,00 KM, naplatom potraživanja 6.425,00 KM, povratom sredstava od prodatih auta 8.200,00 KM, povratom sredstava od lizinga 12.927,00 KM. Ukupno priznata potraživanja na dva ispitna ročišta iznose: viši isplatni red 159.588,59 KM, opšti isplatni red 271.914,37 KM, niži isplatni red 17.052,72 KM. Imajući u vidu troškove stečajnog postupka te povrat sredstava na ime uplaćenog predujma, preostaje iznos od 15.000,00 KM, kojim bi se djelimično namirili povjerioci višeg isplatnog reda u procentu od 9,40 %, dok povjerioci opšteg i nižeg isplatnog ne bi bili namireni ni djelimično zbog nedostatka sredstava.

Rješenjem od 18.05.2023. godine je zakazana skupština povjerilaca za dan 14.07.2023. godine, a kojim je predviđeno da će se, između ostalog, održati izvještajno ročište na kojem će stečajni upravnik iznijeti izvještaj o dosadašnjem tokom postupka sa prijedlogom za dalji tok postupka, prijedlog završne

diobe i odluke o zaključenju stečajnog postupka, a koje rješenje je objavljeno na oglasnoj ploči suda, web stranici suda te u Sl novinama FBiH broj 38/23 dana 24.05.2023. godine.

Na skupštini povjerenika održanoj dana 14.07.2023. godine su, između ostalih, donesene odluke kojima se prihvata izvještaj stečajnog upravnika, usvaja prijedlog diobe stečajnog upravnika od 06.07.2023. godine, te da se izvrši dioba shodno prijedlogu a nakon toga pristupi zaključenju stečajnog postupka.

Napomene radi, skupština povjerenika je usvojila izvještaj stečajnog upravnika u kojem je između ostalog navedeno da su od cjelokupne imovine preostala još dva pištolja za koja nije bilo zainteresovanih ponuđača i to marke CZ 7.65 mm, serijskih brojeva 053922 i 054515 koja su deponovana u MUP TK, pa imajući u vidu malu vrijednost istih ukoliko se za ista ne pronađu kupci do zaključenja postupka, da se oba pištolja ostave na upravljanje MUP TK, a koji će ukoliko isti budu neupotrebljivi shodno svojim procedurama izvršiti uništenje istih.

S obzirom da na prijedlog diobe nije bilo prigovora, da je skupština povjerenika usvojila navedeni prijedlog bez izmjena i/ili dopuna, te da je i po ocjeni suda prijedlog bio u skladu sa zakonom, temeljem odredbe člana 188 stav 6 Zakona o stečaju ("Sl. novine F BiH" br. 53/21) sud je rješenjem od 26.10.2023. godine dao saglasnost na prijedlog završne diobe podnesen od strane stečajnog upravnika dana 06.07.2023. godine.

Podneskom od dana 09.11.2023. godine stečajni upravnik je obavijestio sud da je izvršio diobu u skladu sa prijedlogom na koju je sud dao suglasnost, u prilogu dostavljajući dokaze o izvršenoj diobi u vidu uplatnica.

Slijedom svega navedenog, a temeljem odredaba člana 190 stavovi 1 i 2 Zakona o stečaju, sud je donio odluku kao u stavu I dispozitiva ovog rješenja, uz napomenu da je skupština povjerenika dana 14.07.2023. godine donijela odluku da se ne provodi revizija s obzirom na manju vrijednost imovine koja čini stečajnu masu i jasno finansijsko poslovanje kako se ne bi stvarali dodatni troškovi.

Nadalje, temeljem odredbe člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama FBiH te dostaviti FIA, dok je odredbom člana 204 stav 2 istog Zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama FBiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

STEČAJNI SUDIJA
Vedran Mišić

Pouka o pravnom lijeku:

Protiv ovog rješenja je dozvoljeno izjaviti žalbu Kantonalnom sudu u Tuzli, koja se podnosi putem Općinskog suda u Tuzli, najkasnije u roku od osam dana počev od isteka petog dana od dana objavljivanja rješenja u Sl. novinama FBiH.